

摘藻堂四庫全書薈要

集部

欽定四庫全書薈要

集部

元詩選三集卷二

三

詳校官編修臣王天祿



欽定四庫全書薈要卷二萬四百五十六

集部

元詩選三集卷二

長洲

顧嗣立

編

陳普石堂遺集



普字尚德別號懼齋福寧州之寧德人居石堂山下淳熙間朱紫陽嘗過石堂異其風土曰後數十年此中當出儒者普生淳祐甲辰鷓鴣百數繞屋七歲時坐田間有白鷺飛止有士人戲語之曰汝能賦一詩乎應聲曰我在這邊坐爾在那里歇青

天無片雲飛下數點雪士人奇之稍長聞韓翼甫  
倡道浙東翼甫派出輔氏而原于考亭遂負笈往  
遊宋亡絕意仕進朝廷三使辟為本省教授不起  
隱居授徒四方及門歲數百人館里之仁峰僧舍  
至不能容大德初建州劉純父聘主雲莊書院熊  
勿軒延講鰲峰尋講德興之初菴書院晚居莆中  
十有八年延祐乙卯卒于家年七十二學者稱石  
堂先生所著字義四書句解鈴鍵學庸旨要孟子纂

圖周易解注易說書傳補微四書五經講義渾天  
儀論天象賦咏史詩斷凡數百卷明嘉靖間寧德  
訓導浮梁閔文振訪於其家採之諸載訂彙為二  
十二卷曰石堂遺集知縣事揭陽程世鵬刊行於  
世出石堂門者如韓信同楊琬余載黃裳輩並以  
正學為時所宗云

擬古四首

秋聲金氣流天空露瀼瀼素波合流月淫淫滿庭霜遙

夜一美人寒閨自徬徨暗塵集凌波輕飈感鳴璫天性  
賦貞清動止中矩方世無夔夔子窈窕空英皇抱璞如  
臨淵日入不下堂時操弄玉簫空中來鳳凰歲月如流  
星髮變面欲黃服玉固雪膚絕意百兩將

秋夜永如年四壁號寒蛩明月照樹葉白露啼青桐寒  
窻紫玉琴時變羽凌宮三彈不成調百憂鬱攻中

東方有樂國開闢先柏皇鸞凰為雞鶩麒麟為犬羊晨  
霞作朝食太和為酒漿土無干戈禍人各千年長下視

禹九州有土皆戰場白日虎狼行青天蛟龍翔我欲為  
遠遊滄海渺無梁何年夸娥氏移置天中央

同根一味草時命嗟異遇風月芳香合兩地隔周楚爾  
生麟趾家朝夕沐玉露我在雲夢林百草相蒙妬白璧  
終不緇惇惇亦良苦

和友人韻

兒童恨芳草不識春長在簞瓢日晏如焉知顏樂改黃  
鶴雅入聽鶻鳩亦可罪混沌何曾死拱壁莫輕碎野馬

志流行遊絲無罣礙緬懷良友心不言默相對願為蛩  
駝交共話螻螳戴

古田女 并序

吾州近郭五六縣土風悉如老杜所賦夔州女而  
郭尤甚每慚無以答四海兄弟之詰問一日來古  
田見傍縣一二十里內於插秧時亦如之以為三  
時惟此時最忙不可不為夫子之助也其說則甚  
善而其事則未可愚以為不如其已也皆吾人也



作詩以道之幸其一聽作華夏人豈不足以美吾  
東南一隅哉

昔年過饒州一事獨希差清川浴婦人以晝不以夜上  
流濯垢膩下流汲歸舍供佛與事尊共用如啗蔗朝昏  
賣魚蝦晴雨親耕稼樵採與負戴咸與夫並駕流汙浴  
豈非失禮事可訝我時適逆旅一見為汗下欲言不可  
得況敢加譏罵靜惟天下事無邊可悲咤一從文王沒  
聲教不踰華巴兜與閩粵至今愧華夏男不耕稼穡女

不專桑柘內外悉如男遇合多自嫁雲山恣歌謠湯池  
任騰藉插花作才僧城市稱雄霸梳頭半列肆笑語皆  
機詐新奇美濃妝會合持物價愚夫與庸奴低頭受凌  
跨吾閩自如此他方我何暇福州縣十三余幸窮崖下  
十里近郭縣此俗獨未化一日來古田拔秧適初夏青  
帟半絞扎水泥和撥迓事事亦不惡位分無假借三王  
二帝年人倫密無罅冀方古當塗豐水今漣灞見惡如  
豺狼嗜禮如膾炙固無期桑中亦無舞臺榭一國皆若

狂一年唯有蜡  
盛年事耕織  
斑白可休暇  
習見宜如常  
驟異良以乍  
勸君但勤饁  
茲事宜永謝  
倘能用吾言  
雞豚願同社

望雲

幾愛山中雲  
杳靄起無跡  
晴風吹綠樹  
天節日已尺  
悠揚幾片飛  
土岫度絕壁  
斂作蒼狗形  
舒為鯢鵬翼  
朝抹我媚青  
暮蘸滄海碧  
江南與江北  
蕩蕩恣所適  
何如雲中仙  
避囂隱幽寂  
採藥雲下林  
礪劍雲上石  
乘雲騎茅

龍倚雲吹鐵笛我欲往從之飄然不可測

壬辰日蝕

憶昔度宗皇帝時十年十三日食之似道黷亂湖海曲  
天子宮庭耽樂嬉滿朝翁翁皆婦人禍來照鏡方畫眉  
北軍順流日食既兩國正爾爭雄雌興亡豈必皆有數  
百年以來士氣衰文臣髀肉不識馬武士驚魄怕見旗

夜臺

壬午焚道  
經留老子

角陵初為五斗盜崔浩繼作千尋宮重黎不生大禹死

鬼魅雜出交蛇龍妄夸奪盡離婁明虛喝弱却樓煩弓  
禮樂沈淪入九地陰邪叫嘯充虛空人寰黯淡如夜臺  
百物悽愴生芒鋒虎狼四出食人肉四冥不受黃流東  
豈無健士能排遏末俗骨醉難為功我欲南遊叫虞舜  
一怒為我誅兜共陰陽草昧風氣閉蒼梧日落天鴻濛  
代天去惡如拔薤後剪枝葉先其宗洗心學易見太極  
百怪冰釋春流通道在不係後與前日月東出開羣蒙  
更須講究銅駝事結正當年河上公

德陽林梅麓太守輓章

殷士皆周祿南音獨楚冠寢車人更怒負俎我何安義  
合雍容就名應久遠看梅花真鐵石耐得許多寒

凭闌二首

南浦路東西佳人不可期斷雲荒草渡歸鳥夕陽枝心  
事十二曲頭顱太半絲低徊問流水去去復何之

高豁乾坤眼山晴綠雨收夕陽流水遠荒草白雲浮柳  
蔭小溪側樵歌古渡頭憑虛發清嘯安得仲宣樓

野燒

雜沓平原起電紅，憑陵勢欲逼青峰。  
草茅不問新開甲，蟄戶尤憐乍啟封。  
何暇肩侯分玉石，畧如伯益逐蛟龍。  
際天逸德無人問，獨倚高樓到晚鐘。

懷古

世事悠悠一轉頭，斷雲荒草古今愁。  
青山北去黃河隔，白日西飛東水流。  
秦有金牛開劍閣，楚無熊虎割鴻溝。  
多情蕭寺峰前月，幾夜蛩聲影半樓。

答友人

雲作交遊山作賓  
道心為主自安貧  
柴門無鑰見同物  
竹帛有名終累人  
綠水一潭澄靜性  
青山萬疊裹閒身  
紛紛望拜馬蹄下  
不見胸中萬斛塵

贈清叟行

其君一夜話三生  
語正投機君又行  
溪柳效顰添別恨  
岸花和意送離程  
驚時莫問歸巢燕  
贈別愁聞求友鶯  
今夜夢中重聚首  
雞聲茅店已三更



次答姚考成留別

別後相逢各問年，依然綠髮對華顛。  
閒雲獨占半間住，伴客那無一榻眠。  
酒為愁多全欠力，詩因料少未成聯。  
却憐壁上留題句，時有閒情到月邊。

儒家秋

離離秋色上梧枝，向曉烟雲冷硯池。  
絳帳談經千載道，青山對酒幾聯詩。  
西風紅葉林邊樹，夜雨青燈鬢上絲。  
竹瘦荷枯籬菊淨，暫韜筆硯徹臯比。

烈女秋

陽臺春夢逐浮雲  
燈影西風獨閉門  
一點清心霜六月  
半簾紅葉雨黃昏  
守符終古漸臺水  
墜血經今金谷園  
何事文君無雅操  
琴聲一動便思奔

秋日即事五首

夜牀輾轉恨明遲  
曉髮梳寒倚竹扉  
樹影紙窗風作色  
蛩聲壁罅月流輝  
三盃白酒窮年客  
滿篋紅塵隔歲衣  
遙想白鷗江上路  
蓼花楓葉雨霏霏

玉露金莖曉髮寒秋風仍作去年看蛩聲疎雨長為客  
鴈影殘蟬獨倚闌鐵硯牕櫺雲影淡丹楓溪曲水痕乾  
西風曾與黃花約擬掇繁英貰酒餐

二尺書檠對影居西風吹雪上吟鬚雲邊月色人千里  
竹裏秋聲酒一壺客思邇來紅葉亂鴈聲南去白雲孤  
季鷹自是知機者一念蓴鱸便到吳

書餘飲水枕長肱四壁啼蛩訴不平月色滿窗詩骨冷  
露華方枕夢魂清西風歲歲長堤柳流水朝朝滄海情

紅葉山深無鴈過殘砧幾處搗愁聲

遊絲閃閃挂虛簷翔隼號寒華嶽尖白髮東來閒點易  
烏衣歸去寂鈎簾三千客路飛楓葉四五人家賣酒帘  
魚笛水寒江上晚荒叢豆葉雨纖纖

鼓瑟二首

滿樓明月調雲和五十絃中急雨過彩鳳拂衣鳴翠竹  
素鱗鼓鬣出寒波淒涼楚客新愁斷清切湘靈舊怨多  
一曲更沈人已靜江頭雲挂綠嵯峨

朱絃聲奏徹雲清有客沈吟倚柱聽遺響一時存楚客  
斷魂千載寫湘靈珠隨明月生滄海船挾悲風過洞庭  
絃索無言膠柱倒遙遙江上數峰青

題虎丘

千將化龍飛上天寒崖古木俱蒼然大星西殞化盤石  
銀河倒流通劍泉山鬼夜嘯或風雨坡仙浩氣凌雲烟  
行人慎勿歌團扇誰識風流晉代賢

溪莊

疇昔何來此青山與白鷗絮飛春不去潮泛月頻留

野步十首

南鴈數聲嘹唳西風雙鬢盤髮病葉夕陽滿樹斷雲殘  
雨歸巖

瀟灑枯藤老屨行行只復行行泥路野人屐跡石橋流  
水琴聲

黃犢眼中荒草鷺鷥立處枯荷宦海風濤舟楫故山烟  
雨松蘿

愁思冥鴻杳杳吟情敗葉紛紛歸去滿身溪雨醉眠半  
枕山雲

白日長繩難繫青帝濁酒堪賒歸鶴蒼山雲際故人錦  
字天涯

紅葉林風颯颯蒼苔徑雨斑斑人跡石邊流水樵歌鳥  
外青山

流水數株殘柳西風兩岸蘆花荒草客愁遠道夕陽牛  
帶歸鴉

按步緩尋幽草揚眉一望平林鳥影魚磯日暮豆花村  
屋秋深

幾處漁樵石路數家雞犬柴門竈屋殘烟杳靄溪流淡  
月黃昏

木葉西風古道稻花北隴新田流水美人何處夕陽荒  
草連天

自哂六首

曾騎白鶴上揚州頭上花枝秉燭遊樽酒邇來誰是伴



白雲收盡數峰秋

草澤行吟賦楚騷青麻衣上俗塵多五陵年少休相笑  
戲馬臺前載酒過

鬪雞走馬醉高陽今日歸來兩鬢霜無限少年心上事  
半簾豆雨語寒螿

古樹閒雲獨抱琴琴聲寂靜樹雲深相如渴死文君老  
辜負題橋萬里心

世事悠悠酒幾杯晴蒼把鏡獨徘徊西風吹老梧桐樹

仍送新霜兩鬢來

寬博麻衣折角巾疎慵不似少年身  
白雲半枕山中午猶夢乘槎去問津

邵武泰寧途間一路海棠

萬騎連接出襄國

趙石虎都襄國作萬花騎出入隨從

諸姨撩亂上驪山

唐明皇同貴妃每年十月幸綈嶺諸姨別色隨從望之如錦

道人不識紅妝面何事

扶筇過此間

玉女峯

暮暮朝朝此水頭却無雨怨與雲愁我儀何事堂堂去  
極目天涯雙鬢秋

歸鳥

紫山青嶂盡如家負日衝煙復帶霞今古乾坤秋一幅  
幾番歸鳥與棲鴉

七夕二首

欲理銀河一葉舟不知滿架架蒙鳩漢陰抱甕蒼顏老  
孤負今朝乞巧樓

但把凡身小品論寧須搦頰問星辰  
女郎應別淚如雨  
遑托金針度與人

詠史

錄十六

尚父伯夷

春來秋葉在枯枝底用端著更拂龜  
二老東來元並轡  
馬前何害不相知

四皓

長樂卮前露雪眉巖花亂笑出山時  
有人拍手瓜田裏

來往青門總不知

李廣李陵

茂陵無奈太倉陳槐里家傳本助秦萬落千村荆杞滿  
隴西桃李亦成薪

賈生

落日長沙被鵬驚愁來強把死生輕洛陽才子多流涕  
太息沾襟過一生

武帝三首

商車不足算縉來桑孔咸陽悉茂材一撮茂陵無覓處  
建章門戶至今開

幾多愛子出蕭關山積黃沙骨未還好把望思臺上泪  
隨風北去灑陰山

五十餘年四海波建元三載盡征和中央寸土纔無血  
沃日澆天瓠子河

汲黯

東北民思齋主父西南人欲粉唐蒙漢家社稷何依倚

黯直麤疎一病翁

宣帝二首

不將法律作春秋安得河南數國囚  
莫道漢家雜王霸十分商鞅半分周

渭橋夾道上瑤卮甲館畫堂開禍基  
甘露三年造新室不闕飛燕入宮時

荀彧

亂離揀得一枝棲得道爭知却是迷  
曹操若逢諸葛亮

暮年當作漢征西

河濟泰山猶是漢  
恩恩把作賊關中  
久知天下無劉氏  
不料人間有孔融

北地王諶

何物譙周口似黃  
幾年漢帝手牽羊  
紛紛蜀土祠諸葛  
香火曾分北地王

晉武帝

杳杳香車轉掖庭  
夕陽亭上北風腥  
紛紛羔鵝趨河洛



為見深宮竹葉青

陶侃

蘇峻鯨奔正可憂  
翻令王室備荊州  
五陵松柏無遺種  
謾為桓溫拾竹頭

梁武帝

戒捨工夫老未圓  
百雙雞子送殘年  
一生般若成何事  
贏得江頭載荻船

欽定四庫全書

卷二

甘泳東溪集

泳字中夫一字泳之自號東溪子崇仁人性剛正  
不與時俯仰平生不娶效林和靖讀書不拘繩尺  
尤工於詩年二十餘浪跡東南受知于徐徑畝楊  
東澗又與趙東林黃大山林正菴曾平山遊至元  
二十七年卒有東溪集黃大山序其詩謂高不誕  
深不晦勁不羸全體似李賀而不涉於怪怪奇奇  
出嶺雜言一首凡一千四百字隨事起義隨義鍊

句古今大篇未或過之所作甚富鰲溪刻本止七百三十餘篇今亦失傳可惜也

秋風詞

昨夜西風來人間雨如海山搖搖秋洒洒早起

陶

輪

老紅竟何在惟有殘雲漠漠弄涼態千林萬葉淅瀝作  
豈無綠色奈何凋零四時更變化宋玉何為愁直須痛  
飲千斛酒亦不知有春亦不知有秋鴻濛適我汗漫遊  
絕憐九辯大蕭索爭與蟲聲起籬落東溪子今夕呼月

當中天看我大醉西風前便令秋滿八千歲我醉依然  
月下眠

自述

總角希聞道殘生迺付詩閑曾前輩識敢辱近人知飄  
泊身餘健蕭閒鬢欲衰一簾書四壁寒日在清池

晚立黃洲

今度闌干倚蒼茫入暮天碧溪分市井華屋亂雲烟鐘  
隔春來樹燈流夜去船惜哉題柱壯琴動鳳凰絃

陪完顏御史行金石臺分韻得丞字

勝景踰千載吾人得共登五峯交地勢一水合沙稜荆  
國成何事浮丘有異能山頭有田父未必識中丞

歸來

謂我猶羈旅歸與已的然風霜高枕外江海小詩邊達  
摩移華夏莊周侮聖賢向來知此事未敢棄余年

過南湖

忽有一事礙胃次擺脫不去呼酒來冥冥濛濛混沌在

坦坦蕩蕩虛空開精神一生留筆墨形骸昨夜為尊墨  
年年看梅今白髮晴日江路行莓苔

與危見心同和完顏御史沂聯步踏月韻

明月送人歸明月照人宿月落夢醒時清霜壓寒屋

小絕

一夜睡不着小牕天忽明林塘寒鳥聚聽得最初聲

夜坐

林風自瀟瀟山雨時灑灑丈夫七尺軀地爐使吾矮

早睡

病來貪睡早推月出山前月色不相捨小牕還自妍

酒醒

酒醒桂花發狂歌對花前隣家大罵我夜半驚人眠

書生

踉蹌趣講席讀誦鬪高聲我亦曾如此而今白髮生

暫憩

平生湖海遊南北東西路幾度夢殘時雲深不知處



歸舟二首

片帆懸空秋滿腹涼月淡淡天無波平生湖海元龍意  
早入西風漁櫂歌

天壤豈無蘇季子恨我不識韓荊州遙山蒼蒼暮雲碧  
何許一笛蘆花秋

下豫州

壯懷忍共白雲閒孤負僧房屋半間賣却牢

一作窮

愁三

萬斛載將明月入西山

托意

舊時燈火不知年  
托意篇章未世傳  
胸次只今無此事  
聽風聽雨過殘年


新春

花紅柳綠也逢時  
潤色青春有小詩  
人世苦無吾輩在  
東風寥落亦堪悲

看梅

獨坐息息不自適  
出門偶見梅花開  
自從開闢到今日

此是東風第幾回



毛直方聊復軒斐集

直方字靜可建安人與同邑劉邊近道虞韶以成  
虞廷碩君輔並勤著述工詩文宋咸淳癸酉以周  
禮領鄉薦丙子既革命當路有薦其才者直方退  
然曰使我得貧室如憲窮巷如顏是得天之厚者  
安敢求於分之外也乃優遊閭里授徒講學科舉  
制興郡之以明經擢進士者多出其門省府上其  
名始被一命得教授致仕半俸終其身所編有詩

學大成詩宗羣玉府三十卷行於世所著有治靈  
稟四卷聊復軒斐稟二十卷藏於家

擬古二首

高堂列綺席賓御何委地粲粲金芙蓉春葩照蛾眉檀  
槽起清籟鐵撥弦鷄雞祇聞筵中曲不聞曲中詞蕭蕭  
青冢魂化作秋鴈歸玉關去時淚點點濕朱絲豈知哀  
怨情及此歡笑期彈者錦纏頭聽者金屈卮但令令人  
樂不惜古人悲

野色倏已暝零露沾我裳行役悲險艱仰愧歸鳥翔羈  
愁浩難收壯髮日已蒼遠林烟火微投宿扣村莊居人  
畢刈獲笑語井臼傍問客來何疲母乃仕與商所慎在  
出門奚怨中路長

雜怨二首

種蓮恨不早得藕常苦遲誰知心中事久已各懷思  
花開能夜合草發解宜男對花今有恨見草祇應慚

江南曲二首

津頭聞別語三載以為期安得中山酒醒日是歸時  
沽酒酹江神發船相送餞船去浪如席船回風似箭

妾薄命

妾肌如玉顏如花長眉窈窕青山斜深閨學成新婦禮  
鸞鏡不與留年華昨朝東隣裁嫁衣今朝西鄰催結褵  
自憐孤燈照春夢年年風雨梨花時不怨父母貧不恨  
寒修拙妾生賦命自坎壈底用閒情寫紅葉千絲萬絲  
霜練光與誰織作雲錦裳千針萬針兩黼黻與誰佩服



朝明堂吁嗟妾薄命薄命可奈何失時還自羞失身羞  
更多妾寧失時無失身平生分定月下繩但把貞心守  
貞色肯信嬋娟解誤人

獨駿圖

連天苜蓿青茫茫鹽車鼓車紛道傍肉駿汗血不可當  
權奇侔儻晦若藏五之六之無留良如此獨步何堂堂  
日三品豆慎所嘗天閑逸氣難能量一尺之筭五尺韁  
了與轡絡俱相忘太僕御直儼冠裳庭前榻上婉清揚

有詔有詔且勿忙一洗凡馬鑿鏘鏘我觀此圖筆意長  
欲言尚寄田子方

贈督師曹將軍

泰階煌煌色已齊祥飈為掃蚩尤旗幅員浩蕩春臺熙  
不遣桴鼓驚鉏犁羽林宿衛環三陲居安却慮忘戰危  
整暇自許忘其機司馬八法律以規菟苗獮狩凜弗違  
碧油有幢儼軍帥手持虎節談魚麗閩關不以山與溪  
歌舞七德宣皇威有來視師省檄飛將軍名已草木知

干戈俎豆睢陽時已分  
勾當江南歸流芳奕葉今  
孫枝北行且賦從軍詩  
時清未用歌采薇天子有  
道守四夷泥滑滑

泥滑滑日已西泥深屨滑  
泥浣征衣征衣浣盡不肯  
歸分明數聲行不得請君  
更聽鷓鴣啼

野宿

歸恨逐春深遲休欲縮程  
遠山何處碧落日故鄉明  
路改柴門僻村空石磴鳴  
乞蔬仍買米一宿尚營營

秋感

宇宙百年身江湖萬里心  
世情高枕遠詩味閉門深  
白髮銷窮達青山傲古今  
情知秋亦客何事感秋吟

時秋積雨霽

醞釀豐年付老農挽回涼  
信報詩翁巫山久暗埋寒  
碧湘水初明浴晚紅簾卷  
柳陰先得月簾橫梧影早  
噓風天公快我披雲願萬  
里乾坤一望中

漁父詞七首

萬里清江兩槳船一竿一縷水雲邊平生不識書與劍  
也得醉飽共閒眠

呼兒買米得新粳漁村且喜見秋成今朝嘗新莫草草  
好釣鱸魚來煮羹

得魚穿柳持上溪溪村杳杳屋稀稀莫怪漁翁頭易白  
去年買魚人又非

黃旗網運牛馬走皂衣追呼難狗喧深傍蘆花搖櫓去  
遙望漁人是水仙

本無租賦本無田不知歷日不知年誰信漁家小船上  
獨是無懷并葛天

黃昏船泊有隣居明朝船散又還無君笑我如浮萍草  
我笑君似水中鳬

溪橋竹邊有沽酒攜魚換酒滿胡蘆蓬頭月上不覺醉  
自卷蘆葉吹鳴鳴

悼亡四首

從事龜山亦偶然寧知長別恨終天當時去就商量錯

不似牛衣十八年

客中自有未招魂剪紙空教夜祭門萬一相逢今夜夢  
恨多應是兩忘言

奉倩傷神不是癡人生百感有真機飄零遺墨殘針線  
與淚無期自一揮

推愁不去竟何如欲鼓莊盆懶有餘賴是此愁猶解事  
避人對客與觀書

寄梅村山人二首

古松樹下晝陰寒雲亦無心去不還却怪建州城裏夢  
一春多在湛盧山

去年三客賦茶蘼忽見新花發故枝省到死生離合處  
春風消得幾相思



劉邊自家意思集

邊字近道建安人與同邑虞韶虞廷碩毛直方四  
人齊名所著有自家意思集四卷及讀史撫言若  
干卷月泉吟社分賦春日田園雜興詩近道有句  
云耕鋤曉雨有餘地應接東風無暇時吳清翁極  
賞歎之

仙船巖

仙舟等舫盪萬仞架雲表木石渾莫分風雨能不朽恐

因堯年水艤櫂寄巖竇猶勝夜壑藏有力莫負走奈何  
苦海深忍袖慈航手我欲遡靈源乘槎問牛斗

仙機巖

嘗聞昔天孫謫落人世間雲霞入組織機杼空留山謁  
來巧相逢遺我錦繡端欲報乏綺語再拜重捲還我有  
大布衣可以禦歲寒

會仙巖

青山解隨人遠近互相對寒潭入陵谷龍去知何處歷

歷沙上石羣仙昔來會日暮一童歸橫吹卧牛背

茶竈

仙人足戲劇盤石留渦房紫陽此來遊與客煮茗嘗青  
烟久消歇白雲時飛揚至今潭中水猶作笑語香蒙茸  
履跡在欲步不敢翔三吸此清冷回首入空蒼

林泉寺

采芳仍漱潔散策到來遲客坐自相語僧禪了不知疎  
風潛入戶暗水細鳴池小作石牀夢夢中還覓詩

金少日人  
卷二  
天遊峰

紫翠飛來石蕊間  
何年幻出小瀛寰  
崖懸瘦瀑一千尺  
峽束寒流八九灣  
蒼壁向人如有待  
白雲何事未知還  
歌酣更挹浮丘伯  
坐對中臺話半閒

梅仙山

已是吳門變姓名  
後來誰更識先生  
一杯漢土丹墟在  
萬古閩山劒氣橫  
步入白雲秋石瘦  
坐分黃葉午風清  
逃奴不返松門靜  
隔水寒烟起暮城

伏羲洞

一水之玄去復歸衆峰向背儼相持天荒地老無從問  
鬼刻神劖未解奇丹嶂漫留仙幻跡白雲仍似太初時  
欲窮畫底羲皇意一束靈蓍萬古知

玉女峰

不作巫陽雲雨羞風鬟霧鬢亂蕭颼行人莫問當年事  
獨立寒潭空幾秋

答彥修

九曲溪邊玉女峰  
年年獨倚落花風  
何因不駕青鸞去  
佇立空山皓月中

仙掌峰

銅盤捧露幾何年  
渭水秋風淚泫然  
已向山中間袖手  
為誰半壁更擎天

釣磯石

百尺臺磯瞰碧流  
紫陽仙子幾經秋  
遊魚何事偏深逝  
不道人間有直鈎

郭麟孫祥卿集

麟孫字祥卿吳郡人博學工詩與袁易通甫龔璠  
子敬湯彌昌師言錢重鼎德鈞相率酬唱作吏錢  
塘再調江東歸吳卒其序通甫詩以為詩本原於  
性情之正當其遇物興懷因時感事形之於詩何  
嘗拘拘然執筆學似某人而後為詩哉蓋所蓄既  
深自有不期似而似之者耳觀此可以知祥卿之  
所得力矣

遊虎丘

海峰何從來平地湧高嶺去城不七里幻此幽絕境芳  
遊坐遲暮無物惜餘景樹暗雲巖深花落春寺靜野草  
時有香風絮淡無影山行紛遊人金翠競馳騁朝來有  
爽氣此意獨誰領我來極登覽妙靈應自省遙看青數  
尖俯視綠萬頃逃禪問點石試茗汲憨井意行忘步滑  
野坐怯衣冷聊為無事飲頗覺清晝永藉草方醉眠松  
風忽吹醒



題趙子固蘭蕙卷

寫蘭以左筆為難此圖筆筆皆向左香風一夕從西來  
數片湘雲忽吹墮天真滿前呈爛漫晴烟低葉分婀娜  
紫莖縹緲散曾華翠帶交加藏側朶初觀駭目若零亂  
締視凝神還帖妥想翁落筆風雨疾不待解衣盤薄羸  
但覺書紙如書空唯知有蘭那有我胸中所在皆衆芳  
變化縱橫無不可他人一二已云多翁今能事一何夥  
嗟予作畫雖不能知蘭之趣亦頗頗再觀品題驚絕倒

照眼驪珠十六顆清氣襲人肌骨寒手之不置行與坐  
陶君珍重祕藏之玉軸牙籤善封裹

題高尚書秋山暮靄圖

長江萬里流滔滔風平如席靜不濤老楓疎柳澹雲影  
欹岸側島明秋毫紅塵一點飛不到何人結屋江之臯  
霜清水落沙嶼出蘆葉瑟瑟鴻南翔一峯翠律聳我髻  
俯視培塿如兒曹晴嵐朝爽滴空翠樹林露沐滋流膏  
心融造化意慘澹筆挾風雨聲蕭騷淋漓元氣猶帶濕

收拾萬象無能逃扶輿清淑聚胸次固應獨擅人間豪  
未容小米詫能事千古且說文昌高世間神物不易得  
牙籤玉軸歸時髦我來坐牕疲不遨展卷頓覺舒鬱陶  
何煩蠟屐躋攀勞崦西小紅尋野桃

題蘇子瞻翰墨

山頭翠峯侵霄漢片幅之間據其半河水盤旋寒玉貫  
雲氣濛濛中截斷峯巒回合平若接山城嵯峨聳樓觀  
下有森森林木灌隱約浮空露纖巘沙平野曠征途遠

卷二  
行人凌兢馬欲汗天機滿前呈爛漫濃墨如新筆凌亂  
渾沌鑿空太極判元氣淋漓風雨散若非定以范寬斷  
誰能展此奇手段玉堂老仙重稱賞絕筆當為古之冠  
牙籤玉軸宜倒看縱得千金慎勿換老眼摩挲獲珍玩  
不敢留題只驚歎

題趙榮祿水邨圖

澤國淨秋色遠山橫夕烟水田羣雁起蘆渚一畱縣林  
樹幾間屋君家若箇邊扁舟何日去相伴白鷗眠

與龔子敬同賦

清遊及新霽緩步得嘉賓  
古木寒泉寺鳴鳩乳燕春  
山行六七里舟受兩三人  
總是曾經處何須更問津

三月三日重遊虎丘二首

三月三日天氣好一年一度虎丘遊  
枇杷巖下頻呼酒  
楊柳橋邊旋繫舟  
春事固知欺白髮  
山靈元不厭清流  
祇今觴詠成陳迹  
何用蘭亭俯仰愁

細雨霏霏不濕衣  
山前山後亂鶯飛  
過橋春色緋桃樹

臨水人家白板扉  
此地酒帘邀我醉  
隔船簫鼓送人歸  
清遊恐盡今朝樂  
回首閭門又夕暉

龔子敬同遊桃花塢趙中時適至

麥光曉郭搖香浪花氣浮空散紫霞  
小院碧桃留客醉  
隔林修竹又誰家  
清明過了春將暮  
濁酒傾殘日又斜  
一笑相逢誠不易  
人生看得幾韶華

再題水村圖

分湖新卜築  
適與此詞同  
如今不是畫  
真在水村中

湯炳龍北村集

炳龍字子文其先山

一作丹

陽人居京口辟慶元市

舶提舉學問該博善談論四書五經皆有傳注尤  
深於易詩歌甚工晚自號北村老民所著曰北村  
詩集四明戴表元帥初序曰子文詩肆麗清邃乃  
一如丘園書生山林處士之作太玉山人俞德隣  
宗大序曰子文詩憫世道之隆汙悼人物之聚散  
明時政之得失吟咏諷諫使聞者皆足以戒宣徒

誇競病事推敲者之為哉蓋其易直子諒之心閑  
於中而肆於外者也年八十餘卒子廬為紹興路  
蘭亭書院山長終都護府官屬

湖上觀春

閉門五日雨出門萬山春湖光忽見我搖蕩白雪新九  
節瘦筇杖一幅故葛巾桃花忽相笑聊復此紅塵有錢  
困鞭算有官繫卯申洞然宇宙間餘此自在身但恨不  
能飲我亦無事人



題高尚書夜山圖

人知麗日江山奇月中更奇人不知古今畫手不能畫  
高侯能畫兼能詩風流文采乃如此筆意所到神莫窺  
琉璃宇宙入萬象清寒周匝天四垂羣鴉已息溽露下  
一鴈不度行雲遲龍飛鳳舞又千里一起一伏相追隨  
潮來不見江吸海但見夜壑寂寂舟無遺廢宮隱約認  
孤塔長竿高下標叢祠俯觀下界萬屋如鱗次其間醉  
夢覺者誰金城樹老歲月往昆明劫盡天地移忽忽吳

越已陳迹丹青先寫興亡悲虞山禹穴會稽路蒼蒼涼  
涼隔烟霧平生慣向圖中遊老我卧游無勝具昏花疑  
是雪欲晴剡溪直在無山處何人說與李將軍太清豈  
必微雲皺豪端巽巽肯一掃清光應更餘幾分天然人  
境兩相值樓頭白也思不羣胸中雲夢可八九呼吸沆  
瀣歸雄文虎頭著我坐巖壑書牕半席一詣君舟中不  
須覓謝尚詩成三誦君嘗聞

題江貫道百牛圖

我本山陽田舍叟家有淮南數千畝江南倦客老不歸  
此田都為勢家有猶記少年學牧時日出歸日西  
我生衣食仰此輩愛之過於百里奚祇今辛苦耕硯席  
無處賣文長絕食卷中解后黑牡丹相逢喜是曾相識  
負郭無須二頃田一雙粟角能幾錢數口之家便可飽  
要如此圖知何年平生富貴非所願城府近來尤可厭  
何時倒乘牛背眠東風勝如仰看宣明面

范文正公書伯夷頌并扎卷

退之嘗作伯夷頌網常更為文章重小范老子翰墨香  
吹醒首陽千古夢爾來宇宙三百年劫灰不壞寧非天  
姑蘇李侯賢太守為將手澤歸雲玄因憶右軍修禊叙  
智永藏之固其所今比蕭翼誰賢愚豪奪何如能樂與  
君子於物不留意好德終然勝好古劒許徐君自有心  
書還孔氏非無故粟可不食國可辭較之一紙真豪釐  
聞風廉立遽如許信哉聖人百世師西山之薇何獨美  
向微二子一草耳東海魯連死猶生中書馮道生猶死

承平文獻傳至今品題先後如盍簪就中何人合媿死  
九錫不是夷齊心

白海青

皂鵬赤鵑世紛紛羽翮何如白線紋東海飛來一片雪  
西風透入萬重雲老拳獨擊頑鶯惱俊目寧看狡兔羣  
玉食所需誰可得夜來丹詔賜元勳

綉毬花

誰擲流蘇滿小園無心花萼密相聯唐宮玉蝶團風軟

后土瓊花簇月圓妖態欲來裊上舞異香宜在帳中懸  
試看有物渾成處如在東風太素天

題水晶宮道人甕牖圖

一從辭宰粟饑餓隱空山貨殖門前客先生不啟關

題姚靜齋女柔德一日三封股救其兄云

女生他人婦兄死誰養親封股與紵臂孰仁孰不仁

西湖雜咏

馬塍雞唱曙初回幾處嚴關次第開多少賣花人已到

賸將春色入城來

題莫景行松竹梅圖

一客風流雲水際  
兩侯瀟灑雪霜時  
如今三友交情密  
不到歲寒人不知

題竹梅圖

歲晚江空見此圖  
竹梅相伴占全湖  
如何不與松為友  
應怪人間作大夫





王圭敬仲集

圭字敬仲宛陵人弟璋字敬叔並以詩名嘗與四  
明戴表元帥初吳郡郭麟孫祥卿倡和尤工五言  
敬仲詩如挽貢南漪云福兼鴻範五瑞集鳳雛三  
戴帥初過訪云興寄冥鴻外詩成立馬間敬叔詩  
如題劉御史熙寧諫疏云舉世非新法中朝放直  
臣謝惠帶鏡云寬覺腰圍減明嫌鬢影秋皆佳句  
也時人誦之

和戴帥初陪廉憲副遊三天洞韻二首

勝迹三天洞清遊五字詩懸泉垂馬乳暗谷隱龍池坐  
久禽聲集吟殘樹影移賢侯興不淺應有後來期  
黃葉荒溪滿青蓮紺宇開闌干盤石樹方丈出氛埃洞  
古遊人識巖高倦翼回祇因山下叟常說繡衣來

送吳止水總管入燕

西風萬里送長鑣木落天高秋寂寥季子賢名聞上國  
望之雅意在中朝燕臺此日千金駿漢署當年七葉貂

聖代憂時須共理一麾江海莫辭遙

趙雲仲諸君見訪小酌次韻

長楊旖旎綠陰晴小閣芳菲接謝城  
樂事良辰真具美酒徒詩伴舊知名  
春陰忽散林光變曉露未晞花氣清  
有興時來共幽賞暫時風雨莫寒盟

陳公輔遷居

大隱何嘗厭市閭新遷端為好樓居  
坐來疊嶂雲生麓住近雙溪客有魚  
二頃可供投轄飲五車爭羨載行書

門前怕有西臺使未許興公賦遂初

送李廉使之荆南二首

火落金天爽氣浮澄江練淨引仙舟  
霜威此去清三楚霖雨行看遍九州  
銀漢星槎當好夜渚宮烟樹正高秋  
熙朝國任須元老未許周南此滯留

儒林分席春生座射圃旋車月滿溪  
暫憩棠陰人愛樹無言李下自成蹊  
恩光新拜宮壺賜姓字多因御筆題  
但得明良千載遇腐儒何恨老幽栖

劉有之還京口簡梁中砥知宮

為謝詩家塵外人別來消息斷無聞如何占得三峯住  
不寄山中一片雲

春草

和烟和雨碧萋萋歲歲長亭照客衣春風陌上輪蹄滿  
莫問王孫歸不歸

王璋詩附

璋字敬叔圭弟涿郡盧摯為憲使極器重之

送高羅谷赴德安教

水驛夜初寒風帆向德安青楓三楚路白首一儒官夢  
澤尊前賦巫山雨外看未須嫌獨冷蘭菊政堪餐

次韻郭祥卿雪霽見懷

雪嶺留初日高齋照眼明禽聲交曉樹馬跡上春城有  
客懷幽賞題詩問友生青鞵得來往更待數朝晴

挽董儒仲

憶昔同遊處經春在武林湖光浮鷁淨山木坐猿深事

往唯詩在悲來托夢尋朋知零落盡投老若為心

約文甫不至用韻

俗裏眼能白懷中印未黃雙鳬離葉縣獨鶴下陵陽晚  
歲故人少閒門秋草長知君非遠我自為困壺觴

和帥初稽停山三天洞韻二首

錄一

古洞堂隍敞危巔戶牖開陰靈藏雨電清絕雜塵埃破  
靜幽禽響臨深騎鹿回百年山下路未省使車來

小閣呈兄敬仲

小閣纔容六尺牀苦寒聊與蟄俱藏少安書卷偏能熟  
漫插瓶花已覺香桑火旋分蒸秫竈松風時和煮茶湯  
閒中有事能談妙不問維摩借道場

薛平山諸君見訪分韻得扶字

荒徑經春滿綠蕪喜聞佳客載行厨流鶯度曲時相喚  
泛蟻盈樽不用沽行樂中年憐謝傅坐曹休日笑張扶  
竹林謾詫風流事未學山王指舊壚

寄賀盧疎齋拜集賢



洛下秋來傳近作日邊使至報除書乍歸北闕多新貴  
重直西垣識舊廬陶謝風流連白社應劉文字盛黃初  
深知有意沈冥者自是無心賦子虛

次廣教寺堅師韻

矮牕宜曉取朝陽高檻凭虛接莽蒼咒水鉢中蓮是幻  
坐禪牀畔竹偏長不須沽酒供彭澤耐可吟詩伴石霜  
想見六時天樂下散花吹滿衲衣裳

送梅叔章入燕

少年心力辦驅馳名德家聲世所知到闕可無梅福疏  
贈人唯有宛陵詩行當塞鴈初來日歸約河魚欲上時  
堂北春衫稱壽罷一杯春酒柏山祠

送傅擴齋廉訪秩滿歸長安

南國皇華使東維列宿光選掄應近侍敷歷且殊方地  
鎮江陵重天連蜀道長班荆非客宦負弩盛朝章問俗  
魚鳧國傳杯杞梓堂舞看渝水曲歌倩竹枝娘叔子心  
期遠文翁政術良巡巡持漢節處處即桐鄉瑤厯更新

號宗臺整舊網五驄鳴宛水軒鶴憩陵陽落筆霜威重  
隨車雨氣涼澤中集鴻雁道上屏豺狼舉錯消羣枉封  
培惜衆芳春回魯宮藻詩咏召公棠有客栖南郭無人  
薦蜀莊分庭寬禮數退食問行藏古道今安有深心矢  
不忘方欣為李御旋報促曹裝送客聽雞唱征帆拂鴈  
行楚江楓葉赤陶宅菊花黃未識長安第還分漢署香  
他年懷舊德悵望繡衣裳

宛溪濟川橋成

二水玄暉郡雙橋太白詩江山遺跡在惠政大賢知累  
石砌湍瀨飛梁跨渚涯仙宮鼇鼉屬星漢鵲參差不碍  
乘槎客翻思踏浪兒人從衽席過功類鬼神為利澤通  
千里歡呼其一辭吟詩欲題柱記取落成時

題盛叔章畫

草堂只在南湖上山色水光相與清  
漚鳥不來魚不起  
落花風颺讀書聲

王虎臣詩附

虎臣字子山璋子官於潛教諭

蠶婦歎

貧農值年凶終歲常苦饑貧女蠶不收終年廢機絲無  
食夫婿事無衣妾心悲終朝掇柔桑日暮心力罷居然  
不成繭何以慰我思君不見金谷園中歌舞妾金縷衣  
裳自盈筐一朝禍起墮高樓翠袖紅衿如電滅嗟嗟蠶  
婦莫憂寒孟光身上無衣完

繅絲行

輸班輪機旋若風吳姬拮据無好容神蠶遭烹不自悔  
以死利世功無窮當空一縷如抽雪宛轉縈紆無斷絕  
誰知中有長恨端心事從今為君說車聲愈急絲愈永  
比妾愁腸猶易盡去年絲成盡入官敝衣不足常苦寒  
今年蠶苗猶在紙已向豪家借倉米探湯拾緒手欲爛  
辛苦無人慰憔悴生平自知妾命薄詎忍將愁訴夫婿  
吳綾蜀錦多光輝明朝已上他人機

贈汪鶴舟

吾聞列山之儒騎鶴飛明月為佩霓為衣又聞化鶴丁  
令威七十甲子今始歸先生扁舟載蜚鶴五湖七澤將  
安之江湖舊遊波渺渺牀頭金盡故人少猶能為客典  
春衣酒邊豪氣天地小名賢歌頌題滿軸披圖亦自不  
碌碌黃金白壁分與人惟有便便五經腹竭來訪我坐  
氊冷岸幘扶筇微醅酹開樽促席意氣傾剪燭商詩寒  
夜永星星斑鬢今如此清談自是青雲士試問烟波載  
皜衣何如一舸攜西子

阮受益所藏古硯篆文有羽陽千歲蓋秦穆公  
宮瓦也

洛波沈鼎周姬哀秦嬴義勇歌無衣戎車虎帥雄西郵  
羽陽宮殿雲崔嵬孟明骨化蹇叔死三良殉穆秦民悲  
西風一夜飄宮瓦鴛鴦飛墜秦樓下千年鳥跡今愈分  
故園遺蹤恨難寫何人磨作古陶泓遂使名聲齊玉笋  
君不見懸黎結綠人不識刖足君門卞和泣古來義士  
苦不遭埋骨泥沙同瓦礫





元詩選三集卷二

欽定四庫全書薈要卷二萬四百五十七

集部

元詩選三集卷三

長洲 顧嗣立 編

盧摯疎齋集

摯字處道一字莘老號疎齋涿郡人至元五年進士博洽有文思累遷少中大夫河南路總管真人吳全節代祀嶽瀆過洛陽嘉其治行力薦之大德初授集賢學士大中大夫出持憲湖南遷江東道廉訪使復入為翰林學士遷承旨卒所著曰疎齋

集元初中州文獻東人往往稱李閻徐推能文辭

有風致者曰姚盧蓋謂李謙受益閻復子靖徐琰

子方姚燧端父及疎齋也而推詩專家必以劉因

靜修與疎齋為首錢唐張雨謂疎齋集校官本讀

之一過生風凜然趙郡蘇天爵曰國家平定中原

士踵金宋餘習率皆龐豪哀恭涿郡盧公始以清

新飄逸為之倡延祐以來則有蜀郡虞公浚儀馬

公以雅正之音鳴於時士皆轉相效慕而文章之

習今獨為盛焉臨川吳澄曰涿郡盧學士所作古  
詩類晉清言古文出入盤詰中字字土盆瓦缶而  
倏有三代虎雉瑚璉之器見者莫不改視踈齋嘗  
著文章宗旨云大凡作詩須用三百篇與離騷言  
不關於世教義不存於此興詩亦徒作又云清廟  
茅屋謂之古朱門大廈謂之華屋可謂之古不可  
太羹玄酒謂之古八珍謂之美味可謂之古不可  
知此可與言古文之妙極與臨川之論相合亦即

疎齋自言其得力歟

春晚歛郡高齋

憑高得華構燕坐臨此川  
偶來稅塵鞅得與靜者遊  
忙俗仍楚越城居帶林丘  
川明雲物閒風喧鳥聲幽  
羣峰舉自獻春溪亦爭流  
餘花殿芳序春苗綠平疇  
臨觴詎能飲對時思悠悠  
將指訪凋瘵摩撫庶有瘳  
曠職固所虞永日聊淹留

宣城南郊何氏遊集

懷疴苦無悰撫節驚歲暮淹留屬休告寧復嬰物務幽  
人偶相賞蕭散隨所遇寒郊聯騎出崇岡時延駐山家  
如可即雞犬隔烟霧舉鞭問樵丁始識林下路亭榭歟  
軒敞磊壑鬱盤互主人能愛客何必論雅素濁醪散襟  
顏池鮮足供具雖非窮勝踐政自得野趣日夕歸影亂  
嵐霏襲衣裾鳴騶慎毋前悠然望江樹

用韻答李肅政承之

隩室驚歲暮半菽供朝餐忽聞農夫言東田出遊觀兀

兀遵微行隕籜探茅管霜風亦云厲松柏那可干勝寄  
動睽閨幽素勞音翰如何烟霞姿乃在原隰間叢詞構  
前驅一笑開襟顏豈不懷簡書悠然有餘閒衡門可棲  
遲濡轡聊盤桓明晨下巖壑相望邈河關

郡齋書事兼答汴梁夾谷左丞

十年皇華使咨度愧清裘承命甫為郡慮無理人術簡  
書劇沈迷將迎靡虛日星言入公府短髮不遑櫛首夏  
氣清淑鳥鳴庭樹密疎箔懸永晝南風泛瑤瑟退食方



息偃卒史已盈室孤臣偶紆組宣不懷曠佚賴有同心  
人魁然位丞弼昭昭麟鳳瑞渾渾金玉質華緘猥稱題  
高誼寡儔匹矢心報知己言語詎能畢河流行洪源嵩  
高屹青出期公山水間千秋恒若一

送程中丞介甫赴雲南行臺

蕭蕭征馬鳴冽冽驚飈吹聞君遠行邁執法西南夷六

詔漢始通有唐亦羈縻今雖郡縣置綏懷不在茲物

一作

俗產富金具

一作貝

吏習為磷緇垢衣可無澣直繩詎

一作

誰易持肅躬行所素舉網植其維寒霜固非厲春陽竟

何私

一本作嚴霜自淒厲春陽意何私

坐令蠻風革仰報國士知泛泛

江海容區區簡書期恨恨久別離去去長相思

行農洛西題王居仁山堂春曉

幽人持所見曠然捐世故立薄軒冕榮正有林壑趣興  
居惟自適早晏常暇豫草芳澤氣春鳥鳴嵐光曙巖花  
抗韶容溪雲澹吾慮圖史救宿好朋遊非外慕招邀具  
雞黍笑言在農務我來忝符竹行田課耕助撫卷懷清

風長吟山郭莫

寄博士蕭徵君維斗

秦中幽勝地乃在終南山盤石負磊磊清泉散潺潺  
品侶古君子疊疊泉石間圖史紛座隅衡門晝長闌  
種菊飡落英襲芳佩秋蘭道腴德充符怡然有餘歡  
鳴鶴時一來似愛孤雲閒孤雲不能飛鳴鶴遂空還  
澌澌桃李艷鬱鬱松柏寒羲和馭春暉歲晏霜露繁  
感物有深微懷哉邈難攀

載酒訪王敬仲昆季登樓賦詩得見字

城南有幽人旬浹不獲見  
駕言寫我憂況懷青雲彥  
寒潭照林廬高樓俯郊甸  
偶持一觴酒相與言笑宴  
農畝方委積庭柯謝紛絢  
空山歲年晚聊以觀物變  
此日足可惜攜手盡餘睭

席上答周饒州

美人如修竹日暮何娟娟  
美人如野鶴所貴非乘軒  
遠遊豈不佳緇衣為誰賢  
相別亦云久相看已蒼然  
襟韻

尚豪爽尊俎重留連追憶平生歡見贈長者言鏗鉤咸  
池奏滌渺渤澥淵我無英瓊瑤持以贈君筵為君賦淇  
隩為君歌芝田

寄徵士韓從善

風雅詔屈宋篆隸開鍾王義精太史筆百世宗潮陽予  
生獨後時志欲襲衆芳不踐道德圃遊藝徒皇皇長嗟  
竟焉如嚴駕臨康莊朝馳秦漢郊暮稅鄒魯鄉西州有  
佳人鼓琴諧咸章鏘鳴瓊瑤佩絢粲夫容裳攬衣願從

之遠在天一方習尚或庶幾高節何可望

嘉平十日訪文伯純遂偕施克剛胡明初遊眺  
鰲峯道院飲韋鍊師方丈王敬叔繼至分韻賦  
得山字

蹇余抱私戚無以浣苦顏解組訪詩客  
息駕依松闥羽流所栖處稍出闌闌間  
丈室俯寒英芳氣雲牕閒烟岫列遠郊  
石瀨鳴清灣覽物得深趣觴酌聊循環  
麻姑逝已久琴高杳難攀招搖世氛遠  
髣髴仙遊還即此悟沖

素何必躋蓬山

石鏡精舍

時暇陟林阜聊訪塵外迹  
禪巖瑩靈輝于茲鑑空寂  
看筍出深樾聽泉憩危石  
勝踐已云屢誰能憚行役

湖南憲幕牡丹

仙人何許來絳衣翠為裾  
朝霞映樓居瑞日臨綺䟽  
韶容託植物神奇昇豐腴  
宜無瓊華枝亦有珊瑚株  
國風芍藥贈騷客芙蓉襦  
愧爾顏色好愧爾芳菲殊  
誰云風

霜地亦復雨露濡  
猗猗綠竹抽絢絢  
羣芳餘公餘文墨  
暇嘉賓此虛邪  
時清景逾勝不樂將何如

送李廉使西歸洛陽

靡靡歲年晚肅肅霜露霏  
君子不遑處四牡來騑騑  
月出方皎皎我心恒依依  
今夕復何夕山中依一作仰容輝

惠然有深契使我心悅夷  
北風日已一作以涼行役乃無

期言邁未可留淒然送將歸  
永懷金玉音時得慰渴饑

贈陝西李廉使古意二首



威鳳覽德輝來自丹穴山孤鶴慕文采飛從浙江干鳳  
飲必醴泉啄食惟琅玕簫韶奏虞庭鳳儀五雲間朝陽  
忽西馳梧竹隨凋殘孤鶴黯秋影鴈鶩相與還長鳴九  
臯恨月落天風寒

娟娟秦關月偏照崧山雲山雲自無心而能遠縹塵崧  
雲初未閒下有幽栖人晻晻風雨交悠悠去來頻時時  
宿簷端姿態如相親悲鳴動遙夜天衢屏遊氛秦關謾  
修阻月輝皓無垠願言奮西飛奈此由東隣

岳麓書院舍采禮成 并引

二月初吉采祀竣事詩示僚友掾曹及文學諸生  
誰謂衡山高景行思齊而誰謂衡麓近大路莫致之衡  
高麓云邈洙泗不在茲遠臣禮樂光吉月春陽時原隰  
遂咨度于彼湘之湄薄言采芹藻多士樂且儀酌彼百  
泉水總我駟牡馳我將布惠澤我將迪民彝我將歌白  
駒爰求碩人遺爰求碩人遺空谷夫何為南山有梗楠  
北山有桐椅誰謂衡山高衡麓乃所基

戲贈李廉訪參道

并引

承乏肅政玄悟真筌發軔有初輒依韻奉和

吾生天地間形役何時休六鑿不自閒七情舉相仇歲  
星如驚飈鬚毛忽已秋世路廓悠悠渠能遠行遊谷神  
所依於宛在水中洲羲和既弭節望舒亦停輶終貞實  
乾德坤靈秘奇謀虛白存夜氣接構焉得留去來誰與  
期駕言仍丹丘

題高登封所藏史丞相手帖

登封大夫漢師儒  
潁水洗出商山須  
袖攜尺素照秋碧  
何年滄海遺神珠  
三台光氣五雲朶  
崧君潮來亦軒渠  
龍虎變化風雨散  
竹花不實悲鷓鴣  
故都喬木今何如  
劍履上天不可呼  
長歌緇衣渺愁余

題李伯時九歌圖

蒼龍駟車載初陽  
綠天浮春開八荒  
連蜷飛霧儼冠劍  
四三神君翼東皇  
桂醕盎烈

一作  
列

蘭餉芳楹筵玉現  
紛

披猖瑤琴袵衣香  
何許兩妃倚竹臨  
空江野煙顰翠九

疑遠暮雨灑恨湘波涼冰夷閣投明月璣山鬼夜嘯猿  
猱悲長歌撫節懷楚累遺音疎越知者稀築室賴有佳  
人期紫壇荷屋薜荔惟汀洲聊堪塞杜若怨公子兮悵  
忘歸恍毫怪墨含古色虎頭癡絕公麟癡續騷未成今  
見畫忽欲輕舉起無為朝來目送秋雲飛

題見山樓詩卷

營州少年獵城下樓居主人何為者愛觀陳迹賦如龍  
不與鮮卑鬪馳馬從教遼東無管寧滄波政須濯吾纓

樓頭無時對山色筆端有喙能秋聲朝來見畫思遠策  
慙負團茅舊泉石少姨寄我瑤華音蓬萊水淺嵩雲深

題淵明歸去

一作來圖

留侯晚節從

一作游

赤松武侯早歲稱卧龍仇

一作亡

秦復

一作扶

漢身始終

一作聲隆隆

淵明初非避俗翁兩侯大節將

無同陽秋甲子法王正持筆宛有長沙雄

一作鴈秋持書晉甲子辭

鋒時露長沙雄

易地灞上祁山功

一本無上一句

王弘何恨

一作幸

奉吾

足督郵能芥平生胸歸來種豆南山中斜川只許桃源

通一本無門前五柳春濛濛落絮不與江波東環堵蕭

然吾未窮北牕儘有羲皇風畫圖不盡千古意詩成一

笑浮雲空

### 題子陵釣臺

雲山蒼蒼兮煙水稠石瀨潺潺兮江水流故人兮冕旒

先生兮羊裘使人皆先生兮誰其伊周使人不先生兮

誰其巢由

一有可字

仕止久速兮舍聖人將安

一作焉

求清風

一絲兮豈為名鉤蕉黃荔丹兮香火千秋岸下幾篙兮

榮辱之舟先生一笑兮白雲收

玩鞭亭

缺壺歌斷江聲秋鯨吐漢水皆倒流新亭未絕楚纍泣  
琅琊何至桐宮囚金烏一飛半天赤夢裏妖妖失堅壁  
愁雲不暇護儲胥掣雷騰空去無跡神鞭墜玉驚人間  
王良解鞚龍媒閒烟蕪慘淡碧波遠跛曳羣偷未敢還  
平生作計信良苦纔辦枯骸臭資斧犢車塵尾笑絕纓  
亦有清風滿千古乘時剗斲何足云溫郎高義殊可人



坐觀萬乘此輕舉結舌乃畏黃鬚瞋漢家鼓車千里足  
秦庭主父徒自辱垂堂致戒昧前聞司馬家兒那免俗  
并州越石定不羣向來莽卓烏有墳無人說與桓將軍  
青山白紵君應聞

旌德縣李氏別業

山靈滿意欲留客玉作鳴泉松作石半空亭榭為余開  
一日雲煙盡相識南風挾秋吹畫欄六月小山生暮寒  
野夫平生解高卧問君試借青琅玕

婺源縣齋書事

竹樹映清曉坐聞山鳥鳴  
瓶花香病骨簷雨挾詩聲  
客亦非餘子春無負此生  
明朝余問俗吟罷却須晴

書梓山寺經堂

問俗來山郭

一作谷

攜春到隔谿花香破禪寂  
林樾受鶯

啼欲和觀音偈聊乘醉墨題  
閒雲若留客不肯為余西

青華觀西軒

琳宇夏天曉官曹今日閒  
深松欲無路疎竹不遮山  
靜

對黃冠語時看白雲還平生林壑趣聊復此牕間

少林寺贈達禪師

是日得至面壁  
菴觀達摩石影

古剎東風裏逢僧一解顏收經出深竹披衲下空山未  
要天花墮聊看石影閒何妨病居士明日到田間

茅山作

并序

戊子歲除復如茅山已丑春正月朔舉祝釐之典  
曉登天市壇遂偕崇禧主人過積金中峯留飲松  
溪方丈復歸遠師玉氣凝潤之室

海風吹曉上三山手把韶華滿意看偶向仙家逢歲朔  
不知人世有春寒梅邊杖屨香隨步雲際樓臺玉作闌  
萬古椒花一杯酒醉來騎鶴問還丹

采薇圖

服藥求長年孰與孤竹子一食西山薇萬古猶不死

遊茅山五首

并序

聞句曲山舊矣迺至元戊子春繇宣部行郡漂陽  
省俗其墟距山麓一舍而近凡隆阜勝川曰洞天

福地登諸祀秩者部使者至焉禮也予於是有三  
茅之行至所謂崇禧觀崇禧主人鄒姓以心遠自  
命賔余精舍規構若相第燕室邃潔藻絢過之亭  
翼然水樹竹石間為此山麗瑋勝絕吾二人徜徉  
相與不覺日之夕也遠師衣冠褻然清逸有奇趣  
又多藝能托意繪素以幾物化出所畫鶴工緻詣  
極雖古之善史略無見踰而神韻超拔則又得諸  
方外者如此因舉觴為疎翁壽羽流之宇於上峯

者曰元符萬寧宮亦曰宗壇宗壇師許君翼日肅  
余為神明之觀揮杯倚空引睇無極恨昔之隱居  
者不獲仍丹丘以從余遊也下探華陽洞穴玉膏  
泓渟石髮紛紺涓流赴壑浮花與俱過喜客泉泉  
方井如澈鑑如承以石砥如廣袤丈許深及尋之  
半繚以四廡固以扁鐫門闔維謹壘齊豆蕭于以  
揭虔以祗其泉客至客也泉則喜沸沫潄凜若躍  
蚌胎而貫龍顛者殆不可稱數謂之泉笑否則否

異哉余何以見笑歸復憩遠師所留山間者既信  
宿矣主人睠客殊未艾也予誦樂不可極為解賦  
詩為別序以貽之

馬上微風散薄陰玉笙吹客過華林山中宰相杳何許  
日暮碧峯雞犬音

澗邊瑤草洞中花細水流春帶碧沙昨夜山中  
一作瓢酒  
初熟道人不暇讀南華

竹杪飛亭枕石泉松壇香霧散  
一作趁茶烟鳥聲記得夜

來雨鹿夢驚回別有天

遼天有客訪顓龍好事山人畫者儂  
笑卷雲烟收拾去  
長教函丈在上峰

山君滿意為山留故遣清泉笑不休  
萬斛珠璣三尺玉  
要隨詩句過宣州

題鄒尊師松鶴圖

翦粉昂丹筆有神道人無夢到雞羣  
何時醉拊蒼顓客  
喚起茅山萬里雲



歲旦後四日留別宗壇師松溪許君鄒君心遠

五首

霜袍行客再來時不獨青山慰所思  
咽路黃冠定奇士半能歌我步虛詞

碧溪風日隔人間催出梅花鏡裏看  
莫為輶車太幽獨剩分香玉照春寒

山頭羽客曉相攜踏破蒼雲北斗梯  
偶向茅君岩畔宿卻隨猿鶴過松溪

神裏丹砂腳底雲堯天甲子漢時春只今句曲遊仙夢  
無復商顏避世人

揖雲聊與許君辭月下歸來訪遠師半夜竹聲眞客去  
又教勞動歲寒枝

題太白墓

大雅清風久不聞一盃聊為洗荒墳朱絃三歎無今古  
說與江東日暮雲

送趙左丞之湖廣省二首

十年關隴得春偏，戶有城南尺五天。  
昨夜台躔照吳楚，夢中黃鶴亦欣然。

江空歲晚不堪愁，鸚鵡洲寒鬢欲秋。  
留著梅花莫開盡，為公吹玉過南州。

壁魯洞二絕

南山採藥北山樵，把斷閭風天不知。  
試問龕中二三子，爛柯人是向來誰。

萬古仙巖兩羽衣，一瓢秋水送將歸。  
欲知後夜相思夢，

月滿空山鶴與飛

寶陀寺

老子扁舟日暮回  
眼花不甚見如來  
憑誰揭取羅浮月  
掛向胥江玉鏡臺

梅都官宅

一上高齋憶謝公  
雲間江柳有無中  
詩家政有都官宅  
腸斷荒山落葉風

贈畫梅孫道士

夜夢孤山放鶴翁道人忙打五更鐘覺來摸索闕

月

笑指枯藤問曉風

題葉孝子丹泉廬墓詩卷二首

偶營玄宅近丹泉豈是談空為稚川地下衣衾能不朽  
鼎中龍虎若為仙

晝衽裋屨夕卧苦曉霜不似禮經嚴奪哀朝士歸來晚  
華滿蘭堂月滿簾

集句錢張知事子中

并序


子中吾友秩滿總幕受代屬爾訪余山中禮意良厚至今耿耿不能弭忘聞還衛有日逋客盧摯偶讀陶詩至一朝辭吏歸從我潁水濱有會於心遂集比成章遠寄祖席兼叙高義永以為好也

和澤周三春桃李羅堂前勁風無榮木於我若浮煙與子相遇來傾蓋定前言歲月好已積玉石乃非堅一朝辭吏歸悠然見南山從我潁水濱虛室有餘閒故人賞我趣賴古多此賢吾駕不可迴悵悵獨策還靡靡秋已

夕亭亭月將圓青松冠巖列白雲宿簷端此中有真意  
弱毫多所宣登高錢將歸路遐無由緣良才不隱世來  
曾在何年

元詩選三集卷三





總校官候補中書臣吳紹潔  
校對官編修臣曹 城  
謄錄舉人臣王嵩齡